

Date – 11/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Aizawla Assam Rifles ram chhuahsan hman dan tur ngaihtuah tu Advisory Committee te chu an Chairman Pu Lalduhoma, Chief Minister hovin vawiin khan an thukhawm.
2. Home Minister Pu K. Sapdangan Aizawl International Half Marathon (AIHM) 2026 tun inrinni a Aizawla neih tur ah Mizoram Police mi 150 an tlan dawn a ti.
3. Union Parliamentary Affairs Minister Kiren Rijiju chuan budget sawihonaa Opposition Leader Rahul Gandhi-a thusawi dik lo chungchangah sawrkarin Privilege notice a thehltut dawn a ti.
4. Union Railways Minister Ashwini Vaishnaw chuan sawrkarin West Bengal tan railway budget ah cheng vaibelchhe sing 1 sang 4 leh 205 an dah a ti.

<><><>

ASSAM RIFLES

Assam Rifles ram chhuahsan hman dan tur ngaihtuah tura din pawl hrang hrang aiawh Advisory Committee te chu an Chairman Pu Lalduhoma, Chief Minister hovin CM Conference Hall-ah an thukhawm a.

Canteen Kuala Hari Mandir sawn nan Loch House leh CHAN Office inkarah ram pek a ni dawn an ti a, Loch House chu a lan dan ti danglam lova chei that an rel a. A lo hlut zual theih nan hman tangkai dan ngaihtuah tur a ni.

Advisory Committee hian Convention Centre sak an lo pawm fel tawh chu Vanapa Hall hming puttir an rel a, tuna Vanapa Hall hi a hmanna tur a ngaihtuah dawn a ni.

Chief Minister chenna leh Office sak nan Khatlaa AR ram Joint Survey neih a ni tih tarlan a ni a, Aizawl laili laia War Memorial pahnih Canteen kual leh Treasury Square-a mite hi Assam Rifles lam ten Khatlaa an ram chhunga sawn an tum thu tarlan a ni.

AR chhuahsan ram china kawngpui tihzauh leh siamthatna tur sum sanction hi tun hnaiah hmuh a ni a. PWD lam ten hna an tan thei thuai dawn nia tarlan a ni.

Association for Environmental Preservation (ASEP) chuan AR ram chhuahsan ram zau zawk zaa 52.57 a nihna anga humhalh tura ruahmanna siam a nih avangin Advisory Committee chungah lawmthu an sawi.



ASSEMBLY SESSION

Mizoram Assembly budget session lo awm tur hun hman dan tur duan thar ang chuan Chief Minister Pu Lalduhoma'n February ni 26-ah budget a pharh ang.

Nimin khan Assembly Business Advisory Committee (BAC) chu an chairman Speaker Pu Lalbiakzama hovin a vawi hnih na'n an thukhawm a. Hetah hian February ni 5 a budget session hun hman dan tur an lo duan tawh chu tidanglamin Finance changtu Chief Minister Pu Lalduhoma'n 2026-2027 tangka kum atana Mizoram budget a pharh ni tura February ni 19 an lo ruat tawh chu February ni 26 a pharh zawk turin thutlukna an siam a. Chu bakah Assembly inkhawm pawh March ni 12 thleng kalpui tura lo rel tawh chu March ni 16 thleng tur zawka thutlukna siam a ni. He tianga BAC thutkhawm nawn a ngaihna chhan hi Finance department lamin budget pharh tur an la peihfel hman loh avang ni a hriat a ni.

Assembly budget session lo awm tur hi tuna Assembly ding lai, Assembly pakuana thutkhawm vawi 6-na tur a ni a. Kar leh Thawhlehi February ni 17 chawhma dar 10 leh a chanve-ah assembly inkhawm hi tan a ni ang a, kum tina assembly inkhawm hmasa bera tihdan phung pangngai angin larsap Gen. Vijay Kumar Singh chuan House chhungah sorkar hnathawh leh hmachhawpte a sawi ang. Larsap thusawi chungah lawmthu sawina motion hi a thusawi zawhah putluh a ni ang a, a tuk, Nilaini-ah sawihona hun hman a ni ang a, hemi ni vek hian sawihona hmawr bawh a ni ang.

Chief Minister-in budget a pharh hnu hian a kar leh March ni 1 leh ni 2-ah a tlangpui a budget sawihona hun hman a ni ang a. He mi hnu lamah hian BAC in a duan lawk angin minister-te department chanpual enkawlina tur sum ruahman hi a tah tawla sawiho chhoh a ni bawh dawn a ni. Tun thlengin House chhunga tawngka a chhan chi zawhna (starred question) 973 leh ziaka chhan chi (unstarred question) 339 a lut tawh a ni.



HOME MINISTER PRESS MEET

Home Minister Pu K. Sapdanga chuan Aizawl International Half Marathon (AIHM) 2026 tun inrinni a Aizawla neih tur chu taksa hrisel nana tha tak tur niin a sawi a, Mizoram Police pawh mi 150 an tlan dawn a ti.

Vawiin chawhnu khan Home Minister hian a Pisa-ah chanchinbu mite a kawm a, Aizawl International Half Marathon puala siam T-Shirt a tlangzarh a ni.

Sports Minister Pu Lalnghinglova pawhin thu sawiin, nikum khan Aizawlah hlawhtling takin Marathon an lo buatsaih tawh a, mahni sum leh pai sengso a inelna hmachhawn duh mi tam tak an awm chu lawmawm a tih thu sawiin, kuminah hian

sum leh paia harsatna nei tan Sports Minister Office-ah sawi hreh lo turin a ngen bawk a ni.

(Byte: Sports Minister)

AIHM-ah hian KM 21.1 a thui an tlan dawn a. Mualpuia Rajiv Gandhi Stadium-ah Larsap General (Rtd) Vijay Kumar Singh chuan a vailiam ang a, Silaimualah tlan kualin a hmun ngaijah bawk hian a hmawr bawkna hun hman leh a ni ang.

Inelna hi mipa leh hmeichhe tan a ni dawn a, India ram state hrang hrang bakah ram pawn - Kenya, Ethiopia, Bahrain, UK, France leh Nepal atangte in inziaklut an awm tawh, online bakah February 12-13 hian Lammualah a inziahlul theih dawn a ni.

<><><>

O-DÔH KU

Mara Kut zinga thalaite hman thin “O-Dôh Ku” chu vawiin khan Akashvani CRS Siaha huaihawtin New Siaha Multipurpose Hall ah hman a ni.

Mara Autonomous District Council Deputy CEM Pu S. Lalremthanga chuan hmanpuiin Mara Kut zinga pawimawh tak tuai thar ani chu lawmawm atih thu a sawi a, khawvel changkang zelah tihdan phung a inthlak chho zel tih sawiin pipute atanga tawng leh hnam tihdan phung anlo humhalh thin chu chhunzawm zel a pawimawh thu a sawi a, mahni hnam thiltih chu ngaihhlut leh chawisan a pawimawh thu a sawi.

Dy CEM chuan Mara Hnam pawimawhna leh a tobul bakah hnam ziarang pawimawhna hrang hrang zirna chu MADC huamchhunga zirna in hrang hrangah an zir theih nan hma an la tih sawiin naupang atanga hnam bulpui hriat a pawimawh thu a sawi bawk.

He hun hmanpuitu Akashvani Mizoram Director leh Cluster Head Pu DR Lalropuia chuan khawvel hmasawn zelah hnam ziarang vawn him zel a pawimawh thu sawiin hemi kawngah hian Akashvani CRS Siaha chu an thawhhlawk hle a ti a, IT Khawvelah Radio pawimawhna chu ala ngai reng tih sawiin mipuite tana pawimawh puanchhuah bakah rimawi hmanga mipuite awm tlei kawngah a pawimawh hle a ti a, tawng dik hman kawngah midang zirtirtu pawimawh tak ani tih a sawi.

Byte : Director

Vawiina hun hmanah hian zai leh lama hman a ni a, Mara Thyutlia Py Branch hrang hrang ten hnam lam an entir bawk a ni.

“O-Dôh Ku” hi Mara ina kut an neih pawimawh zinga mi niin thalai ten intihhlumna Kut atana an hman thin a ni a, Mara Kut ropui Lyuva Khutla hma chiaha hman thin niin hnam ziarang pholang thei zai leh lam te nen hun hlimawm tak hman thin a ni.

<><><>

MLDB

Mizo Language Development Board (MLDB) chairman Pu R. Lallianzuala chuan kumin hian Eight Schedule-ah Mizo tawng sengluh a nih theih nan sorkar laipuah ziakin an thlen dawn a ti.

MLDB chairman Pu R. Lallianzuala chuan vawiin khan Akashvani News Aizawl zawhna chhangan, MLDB a din tirh atangin India danpui huangah Mizo tawng dah luh chu an thil tum hmasa zinga mi a ni tih a sawi a, a thuneitu sang chu Home Ministry an nih angin Union Home minister hnenah ngei ziaka thlen an tum tih a sawi a, ziaak bakah tawngka pawhin an thlen dawn tih a sawi bawk.

(Byte: Pu R. Lallianzuala)

MLDB hian Eight Schedule-a Mizo tawng sengluh a nih theih nan hian zirchianna an lo nei fo tawh a, Mizoram chhunga tlawmngai pawl bakah zirlai pawl leh tawng lama thannemngai intelkhawm hrang hrang an be kual tawh a, an zavaiin an inlungual niin Pu R. Lallianzuala chuan a sawi.

India danpui (Article 344(1) leh 351) hian kum 1950 khan a hmasa atan tawng hrang 14 a lalut a, chumi hnuah lakluh belh zelin tun dinhmunah tawng hrang 22 a pawm tawh a ni.

<><><>

PRESS TOUR

I&PR Minister Pu B Lalchhanzova'n vawiin khan MJA member tana buatsaih Press Tour-a Delhi lam pan turte a vai liam.

Directorate of Information and Public Relation Department buatsaih ni sarh chhung Press Tour- February ni 11- 17 chhunga neih turah hian MJA Member pariat leh I&PR aiawh mi pahnih an tel a ni.

Minister Pu B. Lalchhanzova chuan Press Tour nei a zin chhuak tur te chu Mizo hmel lanna, Mizo tana ambassador an nih mai bakah Mizoram pawn thlirna mit an ni tih a sawi a, hemi avang hian Press tour a zin chhuak turte chu Press tour hi in zir zau nan leh Mizoram tana hlawk tam tak nei tur a hmang tangkai turin a fuih bawk a ni.

Press Tour ah hian MJA Memberte hi hmun hrang hrang atang thlan chhuah an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SAMARPAN DIWAS

BJP Mizoram chuan vawiin khan 'SAMARPAN DIWAS' an hmang.

State Media Co-convener Pi K. Vanlalruati chuan, Central BJP Sorkarin Samarpan Diwas hmalakna leh a kalphung te sawifiahin, vawiin hian Pandit Deendayal Upadhyaya thih cham leh amah hriatrengna ni India ram hmun hrang hrang hman a ni a ti a, Pandit Deendayal chu mihring intluktlanna ngai pawimawhtu a ni tih sawiin, chu mai bakah India rama hnam hrang hrangte an hnam nun zia hlutna te hria a, an hnam nun zia chawisan chu a ngai pawimawh êm êm tih a sawi a ni.

Pi K. Vanlalruati chuan, Pandit Deendayal Upadhyaya-in a ngaih pawimawh te chu - India rama hnam leh sakhaw hrang hrang, a bikin hnam tenau zawk te'n an mahni culture, hnam zia leh nunphung, pi pu atanga kan chhawm te chawinung theuh turin ram mipuite a ngen bawk a ni.

<><><>

PRIVILEGE NOTICE

Union Parliamentary Affairs Minister Kiren Rijiju chuan budget sawihonaa Opposition Leader Rahul Gandhi-a thusawi dik lo chungchangah sawrkarin Privilege notice a pulut dawn a ti. Vawiina chanchinbumite a kawmnaah Pu Rijiju chuan Rahul Gandhia hian a thusawiah thu dik tawk lo leh belhchian dawllo hmangin Prime Minister Narendra Modia a puh a ti a. Lok Sabha leh Rajya Sabha-ah inkaihhruaina chiang tak a awm chungin Rahul Gandhi hian a bawhchhia a ni a ti a. Pu Rijiju chuan house chhunga a thusawite thu tak a ni em tih tichiang thin turin Rahul Gandhi a ngen a ni.

<><><>

UNION RAILWAY MINISTER

Union Railways Minister Ashwini Vaishnaw chuan sawrkarin West Bengal tan railway budget ah cheng vaibelchhe sing 1 sang 4 leh 205 an dah a. Vawiina Lok Sabha-a zawhna chhangin Pu Vaishnaw chuan West Bengal tana an dah tam ber tum ala ni a ti a. UPA sawrkar chhung kum 2009 atanga 2014 chhung khan cheng vaibelchhe sang li leh 300 chauh dah a ni a ti a. West Bengal-a Railway project atan ram hectare 4662 mamawh anih thu sawiin heta tang hian zaa 27 chauh ram an la hmuh thu a sawi a ni. Maharashtra-a railway hmasawanna chungchang sawiin Pu Vaishnaw chuan chak taka hmalak a ni a ti a. Tunah hian cheng vaibelchhe nuai 1 sing 5 chuang hna thawh mek anih thu a sawi a ni.

<><><>

PM

Prime Minister Narendra Modi-a February ni 14 ah Assam a tlawh dawn a. Pu Modia hian hmasawanna hna thawh chi hrang hrang a hawng dawn a. Heng zingah hian Northeast-a a hmasa ber turin Dibrugarh district chhung Dibrugarh-Moran inkara Chabua-ah highway-based emergency landing strip a tel a. Pu Modia hian Chabua Air Force Base a tlawh hmasa ber ang a. Hemi hnu hian Moran panin a chhuak ang. He

emergency landing strip ah hian fighter jet engemawzat an tum nghal dawn a ni.

